



28/02/2025



MES 7 25 0000463147

გადაწყვეტილება

სსიპ - ილიას სახელმწიფო უნივერსიტეტის „სამართლის“ სადოქტორო
საგანმანათლებლო პროგრამის აკრედიტაციის შესახებ

1. გადაწყვეტილების მიღების სამართლებრივი საფუძვლები

1.1. „უმაღლესი განათლების შესახებ“ საქართველოს კანონის 66-ე მუხლის პირველი პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტისა და საქართველოს განათლებისა და მეცნიერების მინისტრის 2011 წლის 4 მაისის №65/ნ ბრძანებით დამტკიცებული "უმაღლესი საგანმანათლებლო დაწესებულებების საგანმანათლებლო პროგრამების აკრედიტაციის დებულების“ 27² -ე მუხლის პირველი პუნქტის მიხედვით, საგანმანათლებლო პროგრამების აკრედიტაციის საბჭო (შემდგომში - საბჭო) სააკრედიტაციო დოკუმენტაციის, აკრედიტაციის ექსპერტთა ჯგუფის დასკვნის, დაწესებულების მიერ აკრედიტაციის ექსპერტთა ჯგუფის დასკვნის პროექტზე წარმოდგენილი არგუმენტირებული პოზიციის შესწავლისა და ზეპირი მოსმენის გამართვის საფუძველზე იღებს გადაწყვეტილებას საგანმანათლებლო დაწესებულების საგანმანათლებლო პროგრამების აკრედიტაციის თაობაზე. აკრედიტაციის დებულების 27⁵ - ე მუხლის მე-5 პუნქტის თანახმად, საბჭო ვალდებულია დაასაბუთოს მის მიერ მიღებული გადაწყვეტილება.

1.2. „განათლების ხარისხის განვითარების შესახებ“ საქართველოს კანონის 22-ე მუხლის მე-2 პუნქტის „ა“ ქვეპუნქტისა და აკრედიტაციის დებულების 27⁵ - ე მუხლის პირველი პუნქტის „ა“ ქვეპუნქტის შესაბამისად, საბჭო იღებს გადაწყვეტილებას საგანმანათლებლო პროგრამისთვის აკრედიტაციის მინიჭების შესახებ, თუ „უმაღლესი განათლების შესახებ“ საქართველოს კანონის 66-ე მუხლის მე-4 პუნქტის, „განათლების ხარისხის განვითარების შესახებ“ საქართველოს კანონის 22-ე მუხლის მე-8 პუნქტისა და აკრედიტაციის დებულების 27⁶ - ე მუხლის პირველი პუნქტის „ა“ ქვეპუნქტის შესაბამისად, საგანმანათლებლო პროგრამის პირველი და ყოველი მომდევნო აკრედიტაციის შემთხვევაში, საგანმანათლებლო პროგრამა აკრედიტაციის სტანდარტებთან შესაბამისობის შეფასებისას, ყველა სტანდარტთან მიმართებით საბჭოს მიერ შეფასდა, როგორც „სრულად ან/და მეტწილად შესაბამისობაშია სტანდარტის მოთხოვნებთან“.

1.3. „აკრედიტაციის დებულების“ 27⁵-ე მუხლის მე-3 პუნქტის შესაბამისად, აკრედიტაციის მინიჭების შესახებ გადაწყვეტილების მიღების შემთხვევაში, საბჭო უფლებამოსილია აკრედიტაციის მამიებელს მისცეს რეკომენდაციები.

1.4. „აკრედიტაციის დებულების“ 27⁶-ე მუხლის პირველი პუნქტის „ა“ ქვეპუნქტის თანახმად, თუ ყველა სტანდარტთან მიმართებით შეფასდა, როგორც „შესაბამისობაშია სტანდარტის მოთხოვნებთან“, საბჭო იღებს გადაწყვეტილებას აკრედიტაციის შესახებ, რაც აისახება საბჭოს სხდომის ოქმში.

2. აღწერილობითი ნაწილი და დასაბუთება

2.1. სსიპ - განათლების ხარისხის განვითარების ეროვნული ცენტრის დირექტორის 2024 წლის 16 სექტემბრის ბრძანების საფუძველზე განხორციელდა სსიპ - ილიას სახელმწიფო უნივერსიტეტის "სამართლის" სადოქტორო საგანმანათლებლო პროგრამაზე სააკრედიტაციო ვიზიტი.

2.2. საბჭომ შეისწავლა საგანმანათლებლო პროგრამის აკრედიტაციასთან დაკავშირებული დოკუმენტაცია, კერძოდ, თვითშეფასების ანგარიშსა და მასზე თანდართულ დოკუმენტაციაში ასახული ინფორმაცია, ექსპერტთა ჯგუფის დასკვნა, ექსპერტთა ჯგუფის დასკვნის პროექტზე აკრედიტაციის მამიებლის მიერ ცენტრისთვის წარმოდგენილი არგუმენტირებული პოზიცია.

2.3. სააკრედიტაციო განაცხადის, აკრედიტაციის ექსპერტთა ჯგუფის დასკვნისა და ექსპერტთა ჯგუფის დასკვნის პროექტზე აკრედიტაციის მამიებლის მიერ ცენტრისთვის წარმოდგენილი არგუმენტირებული პოზიციის, ასევე, სხდომაზე დაინტერესებული მხარის ზეპირი პოზიციის მოსმენის საფუძველზე, საბჭომ სრულად გაიზიარა ექსპერტთა დასკვნაში დაფიქსირებული შეფასება.

3. სარეზოლუციო ნაწილი

„უმაღლესი განათლების შესახებ“ საქართველოს კანონის 66-ე მუხლის პირველი პუნქტის, მე-2 პუნქტის „ა“ ქვეპუნქტის, მე-3 და მე-4 პუნქტების, „განათლების ხარისხის განვითარების შესახებ“ საქართველოს კანონის 22-ე მუხლის პირველი პუნქტის, მე-2 პუნქტის „ა“ ქვეპუნქტის, მე-3 და მე-8 პუნქტების, აკრედიტაციის დებულების 27² -ე მუხლის პირველი პუნქტის, 27⁵ -ე მუხლის პირველი პუნქტის „ა“ ქვეპუნქტისა და მე-5 პუნქტის, 27⁶ -ე მუხლის პირველი პუნქტის „ა“ ქვეპუნქტის, „საჯარო სამართლის იურიდიული პირის - განათლების ხარისხის განვითარების ეროვნული ცენტრის საქმისწარმოების წესისა და შინაგანაწესის დამტკიცების შესახებ“ სსიპ - განათლების ხარისხის განვითარების ეროვნული ცენტრის დირექტორის 2011 წლის 01 ივნისის №223 ბრძანების მე-8 მუხლისა და საქართველოს ზოგადი ადმინისტრაციული კოდექსის 53-ე მუხლის შესაბამისად,

გადაწყვიტა:

1. დაკმაყოფილდეს სსიპ - ილიას სახელმწიფო უნივერსიტეტის მიერ წარმოდგენილი სააკრედიტაციო განაცხადი და დანართი №1-ით გათვალისწინებულ „სამართლის“ სადოქტორო საგანმანათლებლო პროგრამას მიენიჭოს აკრედიტაცია კლასტერის ვადით, 2026 წლის 01 ივლისამდე.
2. ცნობილ იქნას აკრედიტაციის ექსპერტთა ჯგუფის დასკვნა სსიპ - ილიას სახელმწიფო უნივერსიტეტის „სამართლის“ სადოქტორო საგანმანათლებლო პროგრამის შესახებ ამ გადაწყვეტილების განუყოფელ ნაწილად (დანართი №2).
3. ცნობილ იქნას საბჭოს 2025 წლის 28 თებერვლის №222654 სხდომის ოქმის №02 ნაწილი ამ გადაწყვეტილების განუყოფელ ნაწილად (დანართი №3).

4. დაწესებულებას საბჭომ შესასრულებლად განუსაზღვრა შემდეგი რეკომენდაციები და რჩევები:

რეკომენდაციები:

- რეკომენდებულია ინფორმაციის გაუმჯობესება ორ ასპექტში: ასისტენტობის კრედიტები (დაზუსტება იმისა, რომ ეს არის არაანაზღაურებადი აკადემიური საქმიანობა) და

პროგრამაში ინგლისური ენის გამოყენება(ინფორმირება იმის თაობაზე თუ რა ენაზე იწერება დისერტაცია, რადგან ინგლისური ენის, როგორც სამუშაო ენის გამოყენება განსხვავდება ინგლისური ენის, როგორც კვლევის ენის გამოყენებისგან).

- სასწავლო პროგრამის სავალდებულო კომპონენტისთვის - „ასისტენობა“ (12 კრედიტი) რეკომენდებულია სილაბუსების შემუშავება, რომელშიც ასახული იქნება 100-ქულიანი შეფასების პირობები.
- რეკომენდებულია, აცნობოთ თანახელმძღვანელებს პროგრამით გათვალისწინებულ სიაში მათი ჩართვის შესახებ. სასურველი იქნებოდა, რომ პროგრამის წარდგენამდე ფაკულტეტსა და უნივერსიტეტს ეცნობებინათ თანახელმძღვანელებისთვის წარმოდგენილ სადოქტორო პროგრამაში მათი ჩართვის შესახებ.
- უნდა აღინიშნოს პროგრამაში არსებული შეუსაბამობა, რომელიც გამოსასწორებელია. მიუხედავად იმისა, რომ ამ ნაწილში ემერიტუს პროფესორები მოხსენიებულნი არიან, როგორც საბოლოო სამეცნიერო ხელმძღვანელები, 3.2. პუნქტში, რომელიც ასევე ეხება კვალიფიციურ ხელმძღვანელებს, ემერიტუს პროფესორები ნახსენები არ არიან. ჩვენი რეკომენდაციით, სასურველია მოხდეს ამ ორი პუნქტის კოორდინაცია და ამ მხრივ ერთი კრიტერიუმის ჩამოყალიბება. ეს შეუსაბამობა უნდა გამოსწორდეს.

რჩევები:

- სასურველია, პროგრამამ განსაკუთრებული ყურადღება მიაქციოს სადოქტორო კვლევებში ტექნოლოგიების სათანადო გამოყენებას.
- სასურველია, სამართლის კვლევის მეთოდების მოდულში დაემატოს სპეციალური თემა ხელოვნური ინტელექტის გამოყენებისა და კვლევის ეთიკის პრინციპების შესახებ.
- სასურველია, დაინერგოს პროგრამის განახლებისა და გაუმჯობესების ზომები, რათა იგი ადვილად მოერგოს თავად პროგრამის ახალ საჭიროებებსა და გამოწვევებს, ასევე სწავლებისა და კვლევის ახალ მოდელებს.
- სასურველია, გადაიჭრას გამოვლენილი უზუსტობა სამიზნე ნიშნულებსა და სწავლის შედეგების გაზომვას შორის, თანმიმდევრულობის უზრუნველსაყოფად, საჭიროა სამიზნე ნიშნულებისა და სწავლის შედეგების განსაზღვრებების დაზუსტება და განახლება.
- მსგავსად "საერთაშორისო" დისერტაციაზე მუშაობაში კვლევის პროცესის ხელმძღვანელად უცხოელი ექსპერტების ჩართულობისა, სასურველი იქნებოდა განხილულიყო სამომავლოდ ასევე უცხოური სასწავლო გამოცდილების გაზიარების შესაძლებლობა და მისი არჩევით კრედიტებად აღიარება. შესაძლოა მიზანშეწონილი იყოს 42 კრედიტის შემადგენლობის უფრო მოქნილად განსაზღვრა, რათა შესაძლებელი გახდეს ალტერნატიული სასწავლო ვარიანტების დაშვება.
- სასურველია გაფორმდეს დოქტორანტების მომზადებისთვის საჭირო შეთანხმებები უცხოურ უნივერსიტეტთან რეგულარული (მაგ. ყოველ ორ წელიწადში) ერთობლივი პირისპირ სემინარების (მაგ. ორდღიანი) ორგანიზებისთვის, სადაც თითოეული უნივერსიტეტის სტუდენტს თავისი კვლევების, პროგრესისა და ეჭვების წარდგენის შესაძლებლობა ექნება ორივე ინსტიტუციის ექსპერტთა ერთობლივი კომიტეტის წინაშე.
- სასურველია, დაზუსტდეს დოქტორანტების მიერ განსახორციელებელი პუბლიკაცია აუცილებლად უნდა იყოს თუ არა დაკავშირებული მათი სადოქტორო დისერტაციის თემასთან, თუ მათ შეუძლიათ გამოაქვეყნონ სტატიები სხვა, კვლევასთან მეტ- ნაკლებად დაკავშირებულ საკითხებზე.
- სასურველია, გაუმჯობესდეს სამართლის კვლევის მეთოდების კურსის შინაარსი; მოხდეს მისი ადაპტირება თანამედროვე საჭიროებებსა და კვლევის მეთოდების განვითარებასთან.
- სასურველია, უფრო თვალსაჩინო გახდეს კავშირი სამართლებრივი კვლევის მიდგომებისა და ინსტრუმენტების თეორიულ სწავლებასა და პრაქტიკულ მომზადებას შორის. ეს არის წარმოდგენილი სადოქტორო პროგრამის ერთ-ერთი ძლიერი მხარე, რომელსაც მკვეთრად


დადებითი წვლილი შეაქვს სტუდენტების სამეცნიერო მომზადებაში. ძალიან რელევანტური იქნებოდა გარკვეული ტექსტი, რომელიც ამ ურთიერთკავშირს წარმოაჩენდა. ეს უაღრესად მნიშვნელოვანი იქნებოდა მომავალი სტუდენტებისთვის, ვინაიდან არსებით ინფორმაციას მიაწოდებდა პროგრამის სასწავლო სარგებლისა და სწავლებისა და სწავლის მეთოდებს შორის კარგი ბალანსის შესახებ.

- სასურველია გარე ექსპერტების რეგულარული ჩართულობის შემოღება, რაც უზრუნველყოფს მიმდინარე, მრავალფეროვან შეხედულებებს, რომლებიც დაეხმარება პროგრამებს დარგის სტანდარტებთან და საუკეთესო პრაქტიკასთან შესაბამისობის შენარჩუნებაში.
- ილიას სახელმწიფო უნივერსიტეტის სამართლის სადოქტორო პროგრამის ეფექტურობის გასაძლიერებლად, სასურველია პროგრამის ხელმძღვანელებსა და ხარისხის უზრუნველყოფის სამსახურს შორის უფრო მჭიდრო თანამშრომლობის ხელშეწყობა. ეს პარტნიორობა ხელს შეუწყობს პროგრამის ხარისხთან და აკრედიტაციის სტანდარტებთან დაკავშირებული საკითხების უფრო დროულ იდენტიფიცირებასა და გადაჭრას.

5. საბჭოს აღნიშნული გადაწყვეტილება ძალაში შევიდეს 2025 წლის 20 თებერვლიდან.

6. საბჭოს მიერ მიღებული გადაწყვეტილება, საქართველოს ზოგადი ადმინისტრაციული კოდექსის 180-ე მუხლის პირველი ნაწილისა და „განათლების ხარისხის განვითარების შესახებ“ საქართველოს კანონის 24¹ მუხლის პირველი პუნქტის შესაბამისად, საგანმანათლებლო დაწესებულების მიერ შეიძლება გასაჩივრდეს სააპელაციო საჩივრის სააპელაციო საბჭოში წარდგენის გზით შემდეგ მისამართზე: ქ. თბილისი, მ. ალექსიძის მე-2 შესახვევი №2, ან თბილისის საქალაქო სასამართლოს ადმინისტრაციულ საქმეთა კოლეგიაში სარჩელის შეტანის გზით შემდეგ მისამართზე: ქ. თბილისი, დავით აღმაშენებლის ხეივანი N64, აღნიშნული გადაწყვეტილებისა და მისი დასაბუთებითი ნაწილების (დანართი №1, დანართი №2, დანართი №3) კანონმდებლობის შესაბამისად დაწესებულებისთვის გაცნობის დღიდან, ერთი თვის ვადაში.

საგანმანათლებლო პროგრამების აკრედიტაციის საბჭო
მდივანი
ტეფნაძე დავით



საგანმანათლებლო პროგრამების აკრედიტაციის საბჭო
საბჭოს თავმჯდომარე
ლომინაძე თამარ



№	ინფორმაცია საგანმანათლებლო პროგრამის შესახებ	
1	საგანმანათლებლო პროგრამის დასახელება	სამართალი
2	ერთობლივი უმაღლესი საგანმანათლებლო პროგრამა	-
3	სტატუსი	ახალი
4	სტატუსის გათვალისწინებით, საბჭო(ებ)ს გადაწყვეტილების თარიღი და ნომერი	-
5	ხელახალი აკრედიტაციის შემთხვევაში საგანმანათლებლო პროგრამის წინა დასახელება	-
6	უმაღლესი განათლების საფეხური	დოქტორანტურა
7	დაშვების წინაპირობები	-
8	კვალიფიკაციის დონე	VIII
9	კვალიფიკაციის დასახელება	სამართლის დოქტორი
10	ზოგადი განათლების შესაბამისი საფეხურის საგნის/საგნების/საგნობრივი ჯგუფის სწავლების უფლების მითითებით	-
11	დეტალური სფეროს დასახელება და კოდი (ISCED – F – 2013)	0421 სამართალი
12	სწავლების ენა	ქართული
13	ECTS კრედიტების ჯამური რაოდენობა	42
14	განხორციელების ადგილი	ილია ჭავჭავაძის გამზირი N32, თბილისი, 0179, საქართველო
15	მსჯავრდებულ აბიტურიენტთა საგანმანათლებლო პროგრამაზე სწავლასწავლების უფლებამოსილება	-
16	ამ გადაწყვეტილების ძალაში შესვლის თარიღი	20/02/2025
17	აკრედიტაციის საბჭოს მიერ გაცემული რეკომენდაციების შესრულების თაობაზე ანგარიშის წარმოსადგენად/მონიტორინგის განსახორციელებლად განსაზღვრული ვადა	-
18	აკრედიტაციის ვადის გასვლის თარიღი	01/07/2026